



Tha snagain daraich ag ithe meanbh-fhrìdean a bhitheas a' tolladh a-steach don fhiodh no fo rùsg nan craobhan. Le sin tha guib orra gu math coltach ri sgeilbh. Tha claignn glè thiugh orra agus cnàmhan sònraichte airson an cinn a dhìon bho bhuillean trom fhad 's a tha iad a' snaidheadh an fhiodh. Aon uair 's a lorgas iad meanbh-fhrìde ann an toll tha iad ga slaodadh a-mach len teangannan fada steigeach. Tha an teanga cho fada agus gu bheil i air a pasgadh mar phìob am broinn an cinn nuair a tha an guib dùinte.

Tha snàigearan craoibhe a' dol suas is sìos rùsg na craoibhe a' lorg meanbh-fhrìdean. Tha spuirean fada, biorach agus earball fada cruaidh orra, mar a th' air snagain daraich, airson iad fhèin a chumail an àirde air craobhan dìreach. Chan urrainn dhaibh am fiodh a shnaidheadh ach bithidh iad a' cur an guib chaola, chrom a-steach do na tuill agus tha seo ag obair mar ghreimiche dhaibh. Tha snagain daraich agus snàigearan craoibhe rin lorg ann an coilltean seargach agus ann an coilltean durcain.



Tha cam-ghuib ag ithe sìol na craoibh giuthais. Tha bàrr an guib cam (sin mar a fhuair iad an t-ainm) agus tha e mar seo a dh'aona ghnothaich airson durcain na giuthais fhosgladh gus am faigh iad an sìol. Cha lorgar cam-ghuib ach ann an coilltean durcain.

'S e creimich lùthmhor a tha a' fuireach ann an craobhan a th' ann am feòragan. Tha spuirean biorach orra airson a bhith a' greimeachadh ri geugan agus rùsg chraobhan. Tha earball fada orra airson an cuideachadh nuair a bhitheas iad a' leum bho gheug gu geug. Tha iad a' cur feum air am fìaclan biorach airson a bhith a' creimeadh cnothan cruaidhe agus durcain.

Gheibhear feòragan glasa ann an coilltean seargach ann an ceann a deas Albainn agus ann an Sasainn. Chaidh an toirt a-steach don rìoghachd seo anns an linn mu dheireadh. 'S ann ann an coilltean giuthais air Gàidhealtachd na h-Albainn as tric a lorgar an fheòrag dhearg an-diugh.

